



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail: tiryimiyim@gmail.com

TAPAK 7

Yangia anidakangma :



Tir Yimiyim




tir\_yimiyim



tir yimiyim

TAPAK 7



**Iran rara ajanga India nung aluyimba "sector mekongshitsü: Agri Ministry**

**Donald Trump-i Iran rara tembangtsü mulunga lir**

VOL. XXIII ISSUE NO. 169 (ADOK 169) DIMAPUR YANGTEPNÜ (THURSDAY) RONGCHII (APRIL) 02, 2026

₹ 5.00

## Tanü Chümoukedima nung "Red Zone" alitsü

**Dimapur, April 1, 2026 (TYO):** amshitsü memelar ta April 2, 2026 nü Chumoukedima District-i tongtipang nisung ka arua anenzüksü asüba agi security maparen akangshir.

Iba atema April 2 6:00 ako nungi 6:00 ako tashi Chumoukedima District telongtet nung "Red Zone" sangoktsür. Iba tetuyuba kübok Remotely Piloted Aircraft (RPA)/Drones kecha

Commissioner of Police, Dimapur Aotula T. Imchen, IPS-i sangdong ka nung ashi.

Kasa mapang tsungda Security Forces/ Civil Police/ Central Police/ Private Firing Range mesüra licensed fire arms civilian holder temi Firing Practice kecha malitsü aser Firecrackers mamshitsü ta laisa ashi.

## Kma nung Apr 4 nü sodi agütsür

**Dimapur, April 1, 2026 (TYO):** Kohima nung aliba sorkar office tem March 28, 2026 (4th Saturday) nü working day asüba agi April 4, 2026 nü sodi agütsür.

Home Department-i Financial Year Closing atema taoba Honibarnü working day asütsü sangokja liasü aser iba melena tan Honibar sodi agütsür.

## Meghalaya BJP MLA Hek-i FCRA amendment bill ashishia shidi zülü

**Shillong, April 1, 2026 (Agencies):** Meghalaya BJP MLA A L Hek-i Prime Minister Narendra Modi dangi Foreign Contribution (Regulation) Amendment Bill, 2026 atema tebilemtsü kar lemsatepa shidi ka zülüogo.

"FCRA yanglushiba ajanga tetsükdaktsü ajurutsü aser talisa iba jagi non-profit organizations ketdangsubaren nung kongshitsü. Civil society groups aser talisa tamangba yimsü rejutemi North East aser Meghalaya nung mapa tajung inyaka arur" ta MLA Hek-i shidi nung shia lir.

Ibala teloki linük yangerba nung tongti shilem agir aser talisa parnoki education, healthcare, rural development aser humanitarian assistance

wadangtem nung yariteper. Parnokisa sensakertem aser tangar memenepertem yarir aser iba asoshi senotsü ya ozüngi melaba ama aser inyakyim lateta aliba ama inyaker ta Hek-isa metetdaktsü.

Tang FCRA inyakyim lateta aliba ama teloktemi audits aser statutory filings dena maparen ajak tashishitsü melii inyaka arur ta paisa ashi.

Taoba hopta Lok Sabha nung Foreign Contribution (Regulation) Amendment Bill, 2026 benoka liasü aser iba nung bendanglen nungi senotsü teyari aruba akangshitsü shia lir.

Iba Bill nung temelenshi kecha masüidang sendaktepa alir ajak den asüngdangteptsüla ta MLA Hek-i PM Modi dang shiogo.

## NDA-i menden 90-100 angutsü: Himanta Sarma

**Guwahati, April 1, 2026 (Agencies):** Assam Assembly Elections 2026 nung National Democratic Alliance (NDA)-i menden 80 nungi 100 nung takok angutsü ta Assam Chief Minister Himanta Biswa Sarma-i ashi.

Assam nung Opposition-i menden 20 shi ka nung takok angutsü ta paisa ashi.

"NDA-i Lower Assam aser Bodoland Territorial Area Districts (BTAD) dena constituency tongtitem nung takok angutsü. Tihu nunga BJP lennir Chandramohan Patowary-i tera agi asüyonga takok angutsü" ta CM Sarma-i ashi.

Nalbari nung NDA-i takok tulu angutsü aser menden asem nungbosa takok angutsü ta paisa ashi.

Upper Assam kübok Sivasagar nung Rajjor Dal

tanishir Akhil Gogoi dena candidate asem tokteptsü ajisüaka iba constituency nung NDA-isa takok angutsü ta Sarma-isa metetdaktsü.

"Opposition reprangdangra Congress-i menden 20 adena matutsü aser All India United Democratic Front (AIUDF)-i menden 5 nungi 9 tashi ka angutsü. Asom Jatiya Parishad (AJP)-ibo menden ka nung danga takok mengutetsü aser Rajjor Dal-i Dhing constituency nung dang takok angutsü" ta pai ashi.

"Lower Assam kübok Dhubri, Golokganj, Bongaigaon aser Abhayapuri nung NDA-i takok angutsü. Maneni Barpeta district kübok Barpeta, Bhawanipur, aser Bajali constituency tem nunga NDA-isa takok angutsü aser BTAD region nungbo menden ajak angutsü" ta CM Sarma-isa ashi.

## PM Modi-i Assam nung UCC tenzüksü nangzük



**Gogamukh, April 1, 2026 (Agencies):** Prime Minister Narendra Modi-i Assam Assembly elections atema Bodbarnü BJP- aniba NDA campaign tenzüksüogo.

Assam nung Adivasi nunger temeten aser Sixth Schedule areas nung sobaliba senmang kümzüka ayutsü atema Uniform Civil Code (UCC) latettsü ta PM Modi-i ashi.

Dhemaji district kübok Gogamukh nung election rally ka nung jembidang "UCC ya lisopur sobaliba aser ali temetentem wazüka ayutsü aser bendanger ket nungi Adivasi, aluyimer o forest lands atsünga agiba noktangtsü atema asütsü" ta PM Modi-i ashi.

Tanü agiba sentong ya Upper Assam nung BJP campaign tenzükba liasü aser Lakhimpur, Dhemaji, o Majuli district tem

nungi party candidate tem aden.

Prime Minister Modi-i o tenzüka jembidang tamasa Ghuguha Doul aser Donyi-Polo temoatsü meshi aser Assam-i Malinithaan o Dwarka den sobaliba tesentaktep indang jembidi.

Assam nung tesüiba küm 10 tsünga BJP yimsüsüba kübok terenlok tulu nguogo aser ketdangsubaren tajungba kümogo ta pai ashi.

BJP-i Assam nung "hat-trick" takok angutsü aser iba ya Congress asemben atongtepa tamakok anguba asütsü ta PM Modi-isa metetdaktsü.

Assam assembly election atema BJP manifesto nung "double-engine government" ajanga loktiliba nung shilem ajak yaritsü aser renlok daktsütsü nangzüka lir ta paisa ashi.

Assam nung sensakertem asoshi pucca ki tang lakh 22 lir

aser iba nung lakh 15 talisa kümdaktsütsü ta Modi-isa metetdaktsü.

Paisa Lakhpati Baideo scheme ulushitsü nangzük aser iba ajanga tetsür entrepreneurs lakh 3 nungi lakh 40 akümtsü alizüng ayuba ashi.

Congress-i Assam nung küm aika sorkar yimsü süa arudang terenlok bener maru. Ajisüaka, BJP sorkaribo Brahmaputra nung apu 6 yanglu, medical colleges 11 amenok, engineering reju aika lapok aser flood mitigation projects nung Rs 18,000 crore endok ta Prime Minister Modi-isa ashi.

Külen, PM-Kisan scheme kübok aluyimertemi senotsü teyari nguogo ta paisa shisem.

Congress-i bendangertem pusema "vote bank politics" inyaka aru aser 2014 jakdang Communal Violence Prevention Bill amala ozüngtem yanglutsü merang. Iba jagi Congress nem sorkar kümdaktsüra ibala mesükba policy tem asentenshitsü akok ta PM Modi-isa metetdaktsü.

Iba sentong nung Union Minister Sarbananda Sonowal, Assam Education Minister Ranooj Pegu, Lakhimpur MP Pradan Baruah, aser Lakhimpur, Dhemaji o Majuli district tem nungi candidate tem aden.

## BJP ajanga Manipur nung mepetmesü adoker: MP Akoijam

**Guwahati, April 1, 2026 (Agencies):** Manipur nung tawa lendong balala atalokba ya BJP ajanga lir ta Manipur MP Bimol Akoijam-i tai tongloksüogo.

Assam kübok Lakhipur nung Congress candidate Shanti Kumar Singh atema nüboyimba sentong ka nung jembidang MP Akoijam-i iba ya ashi.

"Manipur nung tawa lendong balala atalokba ya BJP ajanga lir. Parnok policy tem ajanga mepetmesü adoker aser iba ajanga parnok ketdangsubaren sayur, kechiyong parnoki telemsa adoktsü ajungmesor" ta Akoijam-isa ashi.

Manipur ya national

framework sasep nung reprangtsüla. Manipur ya India nungi balaka masü saka India nung tongtipang shilem ka lir aser mepetmesü adokbaji state artsü adena aoer ta paisa ashi.

"BJP-i nübortem tribal aser non-tribal ta jalokja Manipur nung telemsa adokdaktsü aser Assam nunga kasa telemsa adoktsü ana nung lir. Yimtenren tsütsü parnok ajangzüksü mechi nung nübortem tsünga telemsa adokdaktsür" ta paisa shisem.

"Congress campaign ya iba tangatetba anema lir aser onoki telongjem atema noktaker. Asenok ajak ka dang anungji telemsa adoktsü inyakba mapa

magizüksüla aser tan Assam election nung Congress nem vote enoktsütsü ayongzük" ta Akoijam-i ashi.

"BJP-i April Fool's joke ama Assam video prokshir aser public-i ibaji metetogo. Iba inyakyim ajanga Congress candidate tem ajangzüksü" ta paisa ashi.

"Chief Minister Himanta Biswa Sarma-i o tululu jembir saka mapabo meinyaker. Assam nung healthcare tsütsü reprangdangra doctor peria mali. Hospital projects tulu inyaktsü nangzükba ya public anisatsü inyakba mapa ka dang lir" ta MP Akoijam-isa metetdaktsü.

## Mkg DC & DEO-i village councils kümdangtsü nenshir

**Dimapur, April 1, 2026 (TYO):** 28-Koridang Assembly Constituency nung by-election atema Mokokchung District ajungalen Model Code of Conduct (MCC) benoka lir.

MCC benoka liaka village council aser local ketdangsur kari political nüboyimba nung shilem agiba, külen tsütsü shir mapa inyakba, senzusenbong alenbangba aser tenokdangba agütsüba osangtem angazükba agi Mokokchung Deputy

Commissioner & District Election Officer-i tetuyuba kar agütsüogo.

Nagaland Village & Tribal Councils Act, 1978 nung section 15 ajanga village council ya District Administration indang kongsang ka lir aser yimtsüng telongtet nung law and order tiptema ayutsü tebilemtsü khuret bona lir anungji mapang shia bangdakpuri ashiba/tuyuba ama inyaktsüla ta DC & DEO Ajit Kumar Verma, IAS-i tanü sangdong ka nung nenshiogo.

Anungji Mokokchung district nung aser Koridang Assembly Constituency kübok aliba Village Council ajaki Election Model Code of Conduct (MCC) sülen anidaktsü tetuyuba agütsür. Village council züngsem kari dang iba tetuyuba alema inyakba putetra Nagaland Village & Tribal Councils Act, 1978 aser tanga ozüngtem kübok tasüngdangba alitsü ta Mokokchung DC & DEO-isa kümdanga inyaksangshitsü metetdaktsüogo.

# Lok Bhavan nung Odisha state Foundation Day amung



**Dimapur, Rongchii/April 01 (TYO):** Odisha state Foundation Day nungtem nung April 1, 2026 nü Dr. Imkongliba Ao Hall, Lok Bhavan, Kohima nung Utkal Divas benjong nung Nagaland Angh Nand Kishore Yadav dena liasü.

Angh-i iba sentong nung jembidang Odia nung den külemi iba sentong nung shilem agiba asoshi tepela lemsatep aser oshi-oben nung ajemdaker India nung mezüingbuba state Odisha, April 1, 1936 nung kumtetba bilemtetba indang rateta ashi.

Iba sentong yagi statehood anguba temaitsü sayuba kisüing masü saka sobaliba, oshi-oben aser Odisha nüburtem dak temulungtetba tulu aliba sayur, ta pai ashi.

Odisha nung sobaliba tajung aliba, talisa akhi alemli Kalinga civilization wangshia aliba indang Angh Yadav-i athishia yimsüsür Ashoka-i Kalinga War nung temulung melenshiba

indang ashi.

Odisha sobaliba tsütsü art, literature aser classical dance ajungba indang pai tushia jembia liasü.

Angh-i Kohima nung iba benjongmung nung shilem agishiba asoshi pelaba lemsatep aser iba amala sentong ajanga India linük nung kin balala liaka telungjem aliba tatishitsü sayur ta ashi.

Pai Nagaland nung Odia nung dang par sobaliba wazüka ayutsü aser state nung lokti tesendaktep asoshi shilem tajung agitsü ayongzüka liasü.

Nagaland aser Odisha ya meta talang agi pilar liaka sobaliba jenjang kasa, nüburtem tesendaktep tajung lir, aser ibaji ajanga linük telungtem tali tashi itshir, ta ashi.

Pai tatem nung Nagaland aser linük tesem balala nung aliba Odisha nung den salem lemsatapa liasü.

Sentong tenzüka Commissioner & Secretary to

the Governor, Thavaseelan K, IAS-i pela agizükba o jembidang Odisha puti otsü aser sobaliba tajung indang lemsatapa liasü aser iba ama benjong yagi Odisha aser Nagaland nung aliba nüburtem tsüingta tesendaktep tali akangshitsü ta ashi.

Odia Samaj Nagaland tir Rama Chandra Panda-i iba sentong nung Odisha Statehood otsü lemsatep aser Prof. Dinabandhu Panda, Advisor, Odia Samaj Nagaland-ia o tatsüka jembia liasü.

Iba sentong nung Odisha nung cultural troupe kati Trahi Durga aser Debimaya tsüingsang agi shilem agi aser Logna Pradhan aser medemer temi Sambalpur (Dalkhai) ken aten.

Kinjal Sahu-i Jagannath Bhajan ken aten aser Sambalpur tsüingsang agi shilem agia liasü.

Sentong tembanga Joint Secretary to Governor, Fiihrhesie Nyuwi-i melepzüing o jembia.

# Tanü nungi Mission Karmayogi - SADHANA Saptah alitsü

**Dimapur, Rongchii/April 01 (TYO):** Department of Personnel & Training (DoPT), Government of India ajanga Capacity Building Commission (CBC) aser Karmayogi Bharat den lungjemer governance capability tashi itshitsü asoshi maneni angazükba yimba sübadaktsü nükjidong nung linük tesem ajunga nung April 2-8, 2026 anogotem SADHANA (Strengthening Adaptive Development and Humane Aptitude for National Advancement) Saptah ayongzüksü.

Iba sentong ya Technology (AI and emerging technologies); Tradition (Indian/traditional knowledge systems

and indigenous innovations and their relevance to governance); aser Tangible outcomes (outcome-oriented, service delivery and citizen centric governance) omen nung rangloker agitsü.

SADHANA Saptah mapang department ajungadang iGOTKarmayogi platform nung register süa aliba sorkar mapa inyaker ajunga ghonda pezü tashi iba sapang nungi angazüktsü metetdaktsü.

Sorkar mapa inyaker ajungadang iGOTKarmayogi platform nung inoktsü atema department ajungadang Nodal Officers shimtsü aser tekeratiba nung department specific Capacity Building PI yanglutsü atema

documents aser employee details agütsütsü metetdaktsü.

Department ajungai omen nung rangloker governance challenges, reform priorities, emergent good practices indang jembitsü atema panel discussions ayongzüksü.

Department ajungai pei training institutes dang domain specific workshops, Mission Karmayogi den peta sessions aser learning programmes ayongzüksü totuyuba agütsütsü. SADHANA Saptah atema MDO Leader tem department indang Nodal Officer ama alitsü aser item inyangsangshi osang ya P&AR nem April 10, 2026 tashinung agütsütsü.

# Sen 10 aser 20 coins magiba tebilemtsü NPYF-i lemsatep

**Dimapur, Rongchii/April 01 (TYO):** Dimapur district tesem balala nung dokan kibur, yokya-yokchir aser nisung kari sen 10 aser 20 coins agizüktsü memulungba mechi National People's youth Front (NPYF), Dimapur District ajanga tebilemtsü akaba lemsatapa district administration nem tayongzüka agüja liasü.

Reserve Bank of India (RBI)-i aiben sen 10 aser 20 coins ya amshitsü ozüing agi melar ta jangjashija aruaka maneni iba sen coins memeshir, anungji nüburtem kanga tim atemer aser anogoshi senotsü amshiba nung timtem ajurur ta ashi.

Iba yagi nüburtem timtem

ajuruba kisüing masü saka rongsenketzüing nunga kongshir, ta NPYF Dimapur District tir Zato Sumi-i ashi.

Danga state tem nungi sen 10 aser 20 coins bener arurtemi itemji Nagaland nung mamshiteter. Anungji coins ya mamshi ayur mesüra danga state nung amshitsüsa akumer aser iba yongji menüingdakba nung senotsü akoksar aser currency circulation nung timtem ajurur aser state rongsenketzüing mejungi kumdaktsür, ta ashi.

Anungji NPYF Dimapur District ajanga Deputy Commissioner, Dimapur dang menungnangi sen 10 aser 20 coins agizüktsü commercial

establishments ajunga nem tetuyuba agütsütsü ajungshir, ta ashi.

Sen tejangja amshitsü memulungba ajanga ozüing nung aibelener nem tapet temerenshi agütsütsü, aser ozüing amshir temi district tesem ajunga nung iba ozüing amshidaktsütsü, ta NPYF Dimapur District ajanga ashi.

Legal tender agizüktsü memulungba ya ozüing nung aibelenba lir aser iba ya tekeratiba nung bentetsü, ta ashi.

Parnokisa nüburtem dang osang tiazü meporokshitsü aser state nung financial transactions shidak alitsü ayongzüka liasü.

# Dimapur Police-i mapa tamajung inyaker nisung ana apu

**Dimapur, Rongchii/April 01 (TYO):** Dimapur Police-i mapa tamajung inyaker nisung ana Bengaluru nung puogo. Iba ken o ya July 22, 2024 anepdang aibelen mapa inyakba ken o ka July 25, 2024 nü Women Police Station Dimapur dangi aruba nung FIR ka benokba indang lir.

July 22, 2024 nü ken o agütsür aser lar kinunger ka Old Showuba Area, Dimapur anasa four-lane highway nung jaja aliba mapang nisung telok kati mita atar apu aser tenük zübangtsür mejangjaba tesem kati anir ao, ta Dimapur Police sangdong ka ajanga ashi.

Iba tesem nung tena dak nisung balalai tim masüba mapa inyaka züka merenshi aser digital payments sapang nungi sen yokdaktsü.

Iba mapang mobile phones, sen aser gold ornaments tem tena ket nungi rakzüik aser tena indang noksa tamajung yimjak nung prokshitsütsü amokmerena liasü, ta ashi.

FIR zülüokba sülen Police temi bushisüingdang tenzüka mezüing kuli asadanga mapang iba mapa tamajung inyakba nung nisung aika dena lir aser taoba mapanga iba mesük mapa tamajung inyaka lir ta jangjatet.

Item mapa tamajung inyakba


nung tai tonglokja alirtem nungi jangjateta alirtem aputsü asoshi police temi operations balala agia aru. Iba ama operation ka agidang, temulung melemi alir ka police dang jenshia arishitepba mapang gari lendong ajurua yirur asü, ta ashi.

Iba dak sendakba nung Niuland Police station nung ken o ka benoka charge sheet süogo. Tashiyim amshia senotsü meshiba nung sendaktepa alir nisung ka iba ken o bushisüingdang tenzüka mapang apu aser pa ket nungi gold ornaments densema auyaba osettsüset meyipa meshiogo.

Technical intelligence nung ajemdaker Dimapur Police-i iba ken o nung jenshia senzür nisung ana ya Bengaluru, Karnataka nung aliba jangjatet aser Investigating Officer-i anir team ka March 28, 2026 nü ao. Parnok Bengaluru atongba sülen Bengaluru City Police den teka amteper operation agia Kothanuru Police Station kübok Ramanna Layout tesem nung tai tonglokja alir nisung anaprong apu.

Tena ya arishi küm 34 tain Vikekhe Yeptho aser arishi küm 28 tain Hesato Yeptho alitsü, ta Dimapur Police ajanga ashi.

# The Gluttons-i 'For You' music video sayaogo



**Dimapur, Rongchii/April 01 (TYO):** Nagaland nungi kentener telok The Gluttons-i "For You" music video sayaogo, anungji nüburtemi parnok indang album tasenba, Modern Naga shilem ka angur. Iba ken nung temeim aser contemporary sound meyoktepa lir.

South Asian cinema nung

aliba elements agi ajungmesoa iba music video yagi temeim indang otsü ka ashir.

Parnoki "For You" sayaba ajanga Modern Naga atema yongya ataba tali akumer, kong region nung kentenba tsütsü shilem tajung agitsü imlar. Parnoki iba kensep ya sayaba sülen nüburtemi sapua agizüktsü parnok teimla lir.

# Election anogo Paid Holiday alitsü metetdaktsü

**Dimapur, Rongchii/April 01 (TYO):** Representation of the People Act, 1951 indang Section 135B nung aliba ama, 28-Koridang (ST) Assembly Constituency nungi Nagaland Legislative Assembly

Constituency atema Bye-Election agitsüba anogo, April 9, 2026 ya iba Constituency nung electors aser Government, banks, financial institutions, private business establishments, industrial undertakings mesüra danga establishment nung mapa inyaker mesüra anogoshi aayanger/casual workers ajunga pei vote agütsütsü mechi Paid Holiday alitsü, ta Home Department ajanga sangdong

ka nung metetdaktsü. Iba ozüing nungya iba Constituency nung electors ajunga adentsü, shirnok establishment mesüra dokan nung shift basis nung mapa inyaker alitsü akok.

Nisung kar iba Constituency nungi ser iba Constituency nung masü danga nung tenzüker mesüra industrial undertaking nung inyaker alitsü akok. Itemjia paid holiday nung adentsü, ta ashi.

Ajisüaaka mapai maruba ajanga lendong mesüra takoksa tulu ajurutsü aliba elector tem atemabo iba sodi anogo ya malitsü, ta sangdong ajangasa ashi.



April 01, 2026 nü New Delhi nung linük tatong Tir CP Radhakrishnan, Lok Sabha Speaker Om Birla, Rajya Sabha Deputy Chairman Harivansh Narayan Singh, Rajya Sabha Secretary General Pramod Chandra Mody, Lok Sabha Secretary General Utpal Kumar Singh aser MP Sudha Murty nungeri Murty-i züluba kaket "Tides of Time" sayatsüdang tangokba noksa nung angur.

### India nunger nütsüng züngdangba maparen tenzükogo

**New Delhi, Rongchii/April 01 (Agencies):** India nung nütsüng züngdangba 'Census' maparen Bodhbarnü tenzükogo; alima nung census tulutibaji ibai asütsü. India nung tesüsabuba census 2011 küm agia liasü, aser 2021 küm agitsü liasü, ajisüaka coronavirus wara aliba agi küm aika thinena aruogo. Küm 10 shia India nung nütsüng züngdangba. India nung iba Census ya 16buba asütsü aser linük nüchiso anguba sülenbo 8buba asütsü. Census 2027 mezüngbuba shilem dang 'House Listing & Housing Census' ajar aser iba ya ita trok agiba sülen taküm September ita nung tembangtsü. Iba mapang nungji kiojen osang, kidang aliba osettsüset aser kibongtem ket nung aliba kiojen osang tejangja bendentsü. Iba shilem atema 'reference' anogoji March 1, 2027 anogo

00:00 ako nungi asütsü (Ladakh aser rürjep agi kongshiba tesemtem- Jammu and Kashmir, Uttarakhand aser Himachal Pradesh nungbo October 1, 2026 anogo asütsü). Andaman & Nicobar Islands, Delhi, Goa, Karnataka, Lakshadweep, Mizoram, Odisha aser Sikkim state tem nung House listing Census ji April 16 nungi May 15 tashi asütsü aser self-enumeration period ji April 1 nungi April 15 tashi asütsü. Madhya Pradesh, Andhra Pradesh, Arunachal Pradesh, Chandigarh, Chhattisgarh aser Haryana state tem nung House listing Census ji May 1 nungi May 30 tashi asütsü aser self-enumeration period ji April 16 nungi April 30 tashi asütsü. Census tanabuba shilem 'nütsüng züngdangbaji' sangküm February nungi tenzüktsü, ajisüaka Ladakh den rürjep agi

kongshiba tesemtem- Jammu and Kashmir, Uttarakhand aser Himachal Pradesh nungbo taküm September 2026 nungi asütsü. Shilem tanabuba kübok nütsüng dak sendakba osang, loktiliba-rongsenkettzüng osang, shisaliok aser tesem melenshiba osangtem bendentsü. Tang mezüng India nunger census nung caste survey-a züngoktsü aser iba atema anogojibo khen lir ang sangdongtsü. India nung tang mezüng nütsüng züngdangba maparenji digital ajanga asütsü. Osang bendenertemi mobile app ka ajanga indangindanga osang metetdaksütsü. Iba dak alia census shilem anaprongla nung self-enumeration atema online sabang agütsütsü. 2027 Census atema Centre sorkari sen crore 11,718 lemsüktsüogo.

### Nalanda nung tekülem kidang nisung 8 ajemset

**Nalanda, April 01 (Agencies):** Bihar kübok Nalanda district nung tekülem kidang nisung nungtepba mapang nung tetsür 8 ajemset, aser iba lendong atalokba dak sendakba nung ketdangser karbo mapa nungi anentsüogo. Mongolbarnü Nalanda district kübok Maghra yim dak Sheetla Mata tekülem kidang sarasademtsü atema lokti tulu adenshai liasü. Lokti tuluji tekülem kidang aitsü nungtepba mapang nung nisung 8 ajemset aser aika yirua liasü; asürtemji ajak tetsürtem liasü. Iba tatalokba bushisüngdangba ajanga security tsütsü metokmeperi aliba jangjaba nung ajemdaker Nalanda Superintendent of Police, Bharat Soni-i Station House Officer of Deepnagar Police Station, Rajmani mapa nungi anentsü aser pei mapa nung tamakok atema police pezü-a mapa nungi anentsüogo. Tekülem ki aser temeket nung lokti tulu achaayangtsü atema police ka dang liasü aser lokti tulu adenshiaka iba osangji tongti ketdangsertem nem memetdaksü, ta bushisüngdangba ajanga bushitetogo. Maneni iba tatalokba ya jungjunga bushisüngdangtsü

atema Special Investigation Team (SIT) ka tentetogo. Deputy Superintendent of Police leniba nung SIT-i lokti azüoktsü atema inyakba, security sepai lemsüktsüba aser police tsüngda tongtepratep maliba kulitem tejangja bushisüngdangtsü. Patna Range Inspector General Jitendra Rana-i iba tesem semdangogo aser aibelenertem nem temerenshi tulu agütsütsü ta metetdaksüogo. Iba tatalokba nung takoksa angur kinüngertemi iba lendong atalokba atema administration nem tai tongloktsü. Iba osang angashia Bihar Chief Minister Nitish Kumar-i tejashi lemsatep aser takoksa angur kibongtem nem senotsü teyari agütsütsü, ta metetdaksü. Iba lendong nung takoksa angur kibong shia nem sen lakh trokrok agütsütsü; Disaster Relief Fund nungi lakh pezüzü aser Chief Minister's Relief Fund nungi lakh anana agütsütsü, ta chief minister-i metetdaksü. Kumar-isa, iba lendong nung yirurtem medical treatment nung indokba senotsü ajakji sorkari agütsütsü, ta metetdaksü.

### Iran rara ajanga India nung aluyimba sector mekongshitsü: Agri Ministry

**New Delhi, April 01 (Agencies):** Bodhbarnü Agriculture Ministry-i, tang West Asia nung rara aliba ajanga India nung aluyimba sector aser aluyimertem mekongshitsü, kechiyong taruba mongpu atema metsühjang aser fertiliser peria dang lir, ta metetdaksü. Ministry of Agriculture-i, Kharif tsünüba mongpu atema metsüh nungdakba dang nungi tali, 19.29 lakh quintals lir, ta metetdaksü. Osangbenertem den jembidang Additional Secretary of Agriculture & Farmer Welfare, Maninder Kaur Dwivedi-i, "Tang alima tensa

nung ajemdaker Ministry of Agriculture & Farmers Welfare-i tensa junga asadangogo aser taruba Kharif season atema nungdakba ajak reprangshiogo. State tem den senteper asadanga ajanga metsühjang peria rizünga aliba jangjaogo. Kharif season atema metsühjang 166.46 lakh quintals nungdaker. Asenok ket nung 185.74 lakh quintals lir," ta metetdaksü. Laisa, tsük, azüngen, mendi aser menjang tapu balala indang metsüh-a peria lir, ta ashi. Maninder Kaur Dwivedi-i, Kharif season atema fertilisers 390.52 LMT nungdaker aser

mezüngbuba shilem atema shilem 46 (180 LMT) lir, ta metetdaksü. Agrochemicals dak sendakba nung Maninder Kaur Dwivedi-i, alu nung mesen asütsü mozü 2.5 lakh MT lir, aser ibaji nungdakba dang nungi kanga tali lir, ta metetdaksü. Agriculture Ministry-i alu nungi züsentedbatem wholesale jenjang-a mita dang reprangdar, aser jenjang matutsü, ta metetdaksü. "Alu nungi züsentedba aonsotsütem tesüiba kümtem nung ama jenjang matutsü. Alo, bengana aser piaz jenjang tajungba dang kumdar," ta lai ashi.



April 01, 2026 nü New Delhi nung Union Minister Hardeep Singh Puri-i senior Supreme Court advocate aser taoba mapang AAP lenir, HS Phoolka nem BJP ticket agütsüdang tangokba noksa nung angur.

### Kuwait nungi India nunger tasü mang 20 bener aruogo

**New Delhi, April 01 (Agencies):** Kuwait nungi India nunger tasü mang 20 Bodhbarnü Kerala nung aliba Cochin International Airport tonga bener aruogo. Asürtemji Middle East rara nung asür ka aser lendong balala nung asürtem lir. Asürtem rongnung arrshi küm 37, Santhanaselvam Krishnan densema lir. Pa ya Tamil Nadu kübok Muthukulathur nungi lir. Pa water desalination plant ka nung lia Iran nungeri drone amshia amakdang asü. Tanüngba India nunger 19 ji tatalokba balala nung asü, ajisüaka tang rara aliba ajanga menor ang tasü mangtemji India tonga bener arutetogo. Tang West Asia nung rara ajanga India nungera nisung ti süogo aser samaba India nunger

kabo tang tashi mangur, ta Hombarnü ministry of external affairs-i metetdakja liasü. Aseem Mahajan, Joint Secretary (Gulf)-i, "Kuwait amakba mapang nung tia makai India nungera ka asü. Onoki par kibong den mangyim jashi lemsateper. Kuwait nung Indian mission-i par kibong den tongtepratepdar aser tekaraba nung tasü mangji bener arutsü atema yangji aliba ketdangsertem den amalitepa inyakdar," ta metetdakja liasü. Hombarnü Kuwait ministry of electricity, water & renewable energy-i sangdong ka ajanga, Amongnü nikongdang Iran nungeri drone amshia amakdang India nunger ka asü aser Power & Water desalination plant den building kanga mejungi raksa, ta metetdakja liasü.



April 01, 2026 nü Haryana kübok Loharu nung aluyimer kati wheat tsükjung bendenba noksa nung angur.



# TIR YIMYIM YIMOBILEM (EDITORIAL)

DIMAPUR THURSDAY, APRIL (RONGCHII) 02, 2026

## Sen agi vote alibaji yiar mapa !

**E**lection ya nübortem nem parnok nungdak jembitsür aser inyaksür shimtsü asoshi maongka agütsüba sentong ka lir, anungji election-i aiertemji tenüng agibo nübortem madak yimsü asütsü asoshi tokteper saka shitakba mapa küma inyakangbo nübortem madak masü saka nübortem kübok tenzüker ka akümtsü. Anungji, election nung tokteperi nübortem tenzüksü asoshi parnok vote alizüksü merangra, ayangeri kibur nungi taa meshitsü melen meyiper kibur nemang taa agütsü amai asütsü. Ibaji candidate ka asoshi yiar aser matumara mapa lir. Ibayongji, asen lima nung election nung tokteperitem aika nüchi agi yiar amai küma timtemba angur. Atangji, nisung aikati yimten yimsüsür kümner, iba jagi election nung tokteper, ajisüaka election nung toktepbaji pei takar akümtsü asoshi masü saka nübortem takar kümdaktsütsü asoshi yimten tashi bushiba mapa ka lir. Ajisüaka, asen lima nungbo aikati election-i aibaji pei asoshi rongsen bendentsü aier amai bilema aier, anungji pei asoshi rongsen benden dang nübortem tali tesensakba kümdaktsür saka tatem nungbo peiang tesensakba aser nübortemang tesensakba ta election-i aiba to sensak toktepdaki ai ama akümer. Akümlü nung nüchi nisung kati yiar kümer inyakba mapaji aji ka asütsü. Atangji, nisung kar ket nung ochimashi len nungi nübortem meyong rakzükbä rongsen bendena lira, item rongsen kiburtemjibo nübortemang asünungji, parnok nem lemsaa agütsütsü asoshi nüchi agi yiar kümer election-i aitsü atema Tsüngremi ajungshir asütsüa akok. Iba amaji asenoki aika dak ataloka angur. Atangji, itemjia Tsüngremer sentong asütsüa akok, kechiyong alima nung Tsüngremi memetet kecha mataloker. Iba amaji ka mesüra shitakba nübortem tenzüksü asoshi shisatsü teindang aser sentong tajung bener election-i aieribo nübortem tenzüksü asoshi sen agi nübortem malitsü. Atangji, akhidangbo, ochimashi inyaknertem atemabo lenmang sademsadema liasü, anungji alima tsütsü reprangtsübo mauyartemang takoksa amai liasü. Aji oda, sen crore aika endoka election nung toktepli, adokerbo iba dang nungi teimba bendenli ta alima nunga ochimashi mapa inyakterem anema ozünga mali amato jakdaka inyakba ngua aruogo. Ajisüaka, itemjia tatem nungbo maka kisüng masü saka sentsütsür-ang akümba asenoki angur. Idakji asenok tan asütsüla. Ano, tanübo akhi ama masü saka auertema ayatsü kanga mesademi kümogo, kechiyong yimti nung cctv ayur, office mapa atema senotsü amshiba ajak bank ajanga dang inyakteper aser ano nübortem asoshi yokba senbo nübortem pei pei bank account-i aotsü. Aji dang masü saka alijak nung terenlok mapa inyakba ajak azüklen nungi satellite ajanga reprangtsü aser mapa inyakba aser sentong agiba ajak anogo, mapang aser tesem ajak shitak adoka noksa agir yoktsü, anungji akhidang ama mapa meiyak ser inyaker amai mesayutetter aser tangar tenüng nung sen agizüka chitsütsüa akanga tasak kümogo. Ajidang masü saka tanü asünungbo nübortema wainshin meteta akümer, anungji constituency shia nung Local Area Development Fund nungi tenzüka department shia nung senotsü endoka terenlok mapa inyakbatem ajak RTI ozüng ajanga telong tashi bushisüngdanga asüngdang, anungji ochimeshinüyonga ochishia alitsüba putu tajungji tanü putu ya lir. Iba ama alima nung yimten inyakyim tajungba küma renlokba jenjang ya meteta, asenoka yiar ama aliba tia nungi nüchi küma arutsü melen nüchi agi yiar ama kümer meinyaktsüla. Joko, election nung sen yong vote ayokba aser sen agi vote aliba putu tamajung to süiogo. Aji oda, tanübo election nung constituency ka nungi candidate ter metsüa iang, pei tangatetba, pei tejangraba aser pei mulung nung bilemba sentong nübortem dang shia tokteptsüba dak alaka, sen agi vote alia election-i ir sentsütsür akümba mapa tobo yiar mapa kümogo. Iba tangatetba nung shilem tajung agitsüsa nübortema election aru atatsüla aser election nung inürtema nübortem tenzüksü bilema renemtsüla.

# OLEMSABANG

## NAGALAND NUNG AONSOTSÜ LU AYIMTSÜ INYAKYIM

Sl. No	Aonsotsü tenung (Crops)		Tapu (Varieties)	Metsü azüngba mapang (Sowing time)		Atsüshia atemtsü mapang (Transplanting time)		Atemba yimya (Method of planting)	Hectare ka nung süngjang (Seed Rate per Ha.)	Tedong tsüngda (Spacing plant to plant)
	English	Ao		Hills	Foothills	Hills	Foothills			
1	2	3	4	5	6	7	8	9	10	11
1	Cabbage	Kobi	Golden Acre, pride of India	March-May	Sept-Oct	March-June	Mid Oct-Dec.	Atsüshia atemtsü	550-650gm	18"x24"
2	Cauliflower	Kobinaro	Kumwari, Deepali, Snowball	April-May	-do-	April-May	Oct-Nov	-do-	500-600gm	18"x24"
3	Knolkhol	-	Early White Vienna	Mar-May	Sept-Oct	Mar-June	Oct-Mid Dec	-do-	1 to 1.5kg	10"x12"
4	Radish	Mola	Japanese White & Full Red	Feb-April	Aug-Oct	-	-	Peroktsü/Tejang azüngtsü	6-8kg	4"x10"
5	Tomato	Bengena	Pusa Ruby, Pusa Early, Dwarf Marglova, Punjab Chaura	Feb-April	Aug-Sept	March-June	Sept-Nov	-do-	500-600gm	12"x24"
6	Brinjal	Süngerlikok	Pusa Purple, Round long Cluster	Feb-April	Aug-Oct	March-April	Sept-Oct	-do-	750gms	18"x24"
7	Chillies	Mersü	Pusa Jwala, Suryumukhi	Feb-April	-do-	-do-	Mar-April	-do-	1to1.5kg	15"x18"
8	Onion	Pias	Pusa Red N-53 (Nasik-53)	-do-	Oct-Nov	Mar-May	Nov-Mid June	-do-	8kg	4"x6"
9	Palak (Spinach)	Palangsak	All green, Pusa Jyoti	Feb-March	Sept-Nov	March-April	Oct-Jan	-do-	25-30kg	8"x12"
10	Lettuce	Narepjibi	Chinese yellow, Simpson	Mar-April	-do-	-do-	Oct-Nov	-do-	2kg	10"x16"
11	Garden peas	Atsü motor	Bonneville, Arkel Jawahar glariose	-do-	Aug-Sept	...	...	Tejang azüngtsü	60-70kg	12"x18"
12	Garlic	Losen	Local	Feb-March	-do-	Mar-April	Oct-Nov	Atsüshia atemtsü	600-800kg	4"x8"
13	Beans	Beans	Dwarf	Jan-May	Sept-Oct	...	...	Tejang azüngtsü	25-30kg	15"x18"
14	Peas	Motor	Arkel	Feb-May	Sept-Oct	...	...	-do-	80-90kg	2"x12.15"
15	Coriander	Dhania	Kalmi	Feb-March	-do-	...	...	-do-	8-10kg	1"x5"
16	Turnip	Salukum	Purple Top White, Early Snowball, pusa chandrima	Mar-April	-do-	...	...	-do-	3kg	6"x10"
17	Carrot	-	Nantu Pusa, Kesar	Feb-Mar	Sept-Oct	...	...	-do-	4kg	6"x8"
18	Lady's finger	Bhindi	Pusa Swami	Mar-April	Oct-Nov	...	...	-do-	10kg	18"x24"
19	Cucumber	Züngi	Japanese green, Poinsettle	-do-	-do-	...	...	-do-	2kg	24"x36"
20	Pumkin	Mapu	Red gourd	Mar-April	Oct-Nov	...	...	-do-	3kg	36"x60"
21	Cow pea	Longpak luli	Pusa Dolastli, Pusa Bursati	Mar-May	Sept-Oct	...	...	-do-	5-6kg	36"x60"
22	Bitter gourd	Kirela	Combator long pusa	Mar-April	Sept-Oct	...	...	-do-	8-10kg	24"x36"
23	Ridge gourd	Poka	Pusa Nasdar	-do-	-do-	...	...	-do-	8-10kg	24"x36"
24	Musk Melon	Mapu züngi	Heramadha	-do-	Oct-Nov	...	...	-do-	5-6kg	24"x36"
25	Water Melon	Anüng Züngi	Sugar baby	-do-	-do-	...	...	-do-	5-6kg	24"x36"
26	Country bean	Tsüngküm Luli	Pusa Early, prolific	-do-	Aug-Sept	...	...	-do-	50-60kg	24"x36"
27	French bean	Kolar	Centener, Menomend long podded premier	-do-	Sept-Oct	...	...	-do-	50-60kg	24"x36"
28	Bottlegourd	Meso lao	Pusa summer, prolific long	Feb-April	Aug-Sept.	...	...	-do-	5kg	24"x36"
29	Snake gourd	Perlao	Pusa long	Feb-April	-do-	...	...	-do-	5kg	24"x36"
30	Mustard leaf	Jebi	Local, Japanese	Aug-Sept	Sept-Oct	...	...	Peroktsü	5-6kg	12"x18"

**NB :**

1. Kobi, Kobinaro, Mersü aser Bengena metsütem tamasa Nursery nung meyidaktsütsüla. Item Nursery tsünglu aser anusangwa nungi kümz?ka ayutsüla. Kodang tedong-chanu tamshitsü junga meytetdir idangji nursery nungi atsüshia alu nungji tedong tsüngda tasazük (Spacing) temalen agüja aliba ama yur atemtsüla.
2. Bhindi, Motor, Kirela, Mola aser Palangsak item lu ayimtsü atema metsüjang alu (main field) nungji taren (Row) nung atemtsü aser taren ana tsüngda temalen agütsüba ama tasazük shitak yur atemtsü junger. Mola, Knolkhol, Carrot aser Salukum atema tekong (line) nung metsü apu-apua peroka atatsü, kodang meytetdir tedong tsüngda tasazük shitak yur talilaji atsüteta endoktsü (Thinning). Motor aser ibala mesükba aonsotsü kobasa züa atur, item atema züa-atutsü (Staking) au-sungküm/kumpok nungtaker.

**Issued by : Agricultural Technology Management Agency (ATMA) Mokokchung, Nagaland.**

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir**

# Haryana nung Yisu kürakyanglu raksatsür ana jail nung puok



India Ato Kilonser Narendra Modi-i 2023 küm April ita Kochi, Kerala nung Khristan denominations balala nungi lenirtem den ajurutepdang tangokba noksa ka yangi angur.

**April 01, 2026:** Haryana state kübok Ambala nung British nung yimsüsüba mapang aliba Tenla kidang Yisu kürakyanglu raksatsüba atema court kati Hindu nung ana küm ana tepuokdak ayutsü obendang agütsüogo.

Ambala Cantonment nung alir Sandeep Kumar aser Ravinder Singh nati ozüing alema kiojen telungi ai, tekülem ki raksatsü aser tsükchitep adokdaksütsüsa inyak, ta Judicial Magistrate First Class Akshay Arora-i metetdaksü.

"Tenati aibelenba yimya nung ajemdaker tena dang taochi sayutsüsa masü, kechiyong tenati ozüing alema aibelen tulu inyakogo. Khristan yimsü anema teseempa nung tenati ozüing alema aibelenogo," ta court-i metetdaksü.

Tang iba ken o nung aija temerenshi obendang agütsür, ajisüaka iba tatalokba ya 2021 küm December 26 aonung atalokba lir.

Iba ken o nung March 7, 2026 nü tena aitsü aser March 27 nü temerenshi obendang agütsü.

Court-isa, "Aibelener ana rongnung kabo sorkar ketdangser lir. Tsükchitep adokdaksütsüsa aser yimsü nung ajemdaker tangar yirutsütsüsa sorkar ketdangser kati inyakba ya mamangteter," ta metetdaksü.

Tena nem temerenshi agütsüba ajanga tangar-a tansütsü aser tena atema-a tansütsü lesson ka asütsü, ta court-i metetdaksü.

Tena jail nung küm anana puoktsü obendang agütsüba den külemi tenaprongla dang senchi meyrjang terer (10,000) achi.

Ajisüaka court-i temaba court ka nung temepishiba ken o benoktsü atema melatsü asoshi tena nem ita ka bail agütsü. Ajisüaka April 8 tashi nungbo tena jail-i meyipa arutsüla.

2021 küm iba tatalokba sülen bushisüingdangba mapang nung nisung anaji Tenla ki compound telungi aiba sülen Yisu kürakyanglu raksatsüba noksaji CCTV ajanga jangja.

Anogo asemnü lir police-i tena pua liasü.

Metong nung metre 1.67 talang Yisu Khrista kürakyangluji Holy Redeemer Catholic Tenla ki kima liasü. 1848 küm East India Company-i Karnal toktsür Ambala nung amenokba sülen iba Tenla ki ya süa liasü.

March 30 nü osangbenertem den jembidang Watchdog Foundation tentetsang, Godfrey Pimenta-i, "Mapang shia yimsü dak sendakba temaitsütem raksatsüba mapang ka nung tang court-i agütsüba obendang ya tatishitsü ka asütsü," ta metetdaksü.

Paisa, yimsü dak sendakba temaitsütem raksatsübaji zübazüba magitsü aser telemsa adokdaksütsüsa inyakertem nem temerenshi agütsütsü, ta court obendang ajanga tejangja sangdonger, ta metetdaksü.

All India Catholic Union otongdar, John Dayal-i, iba temerenshi agütsüba ajanga aika tansütsü, ajisüaka tilateri telemtetba agiba dang agibo linük nung Khristantem reshikangshiba tebilemtsü ya mebentetsü, ta metetdaksü.

## ANOGO ABEN TSÜNGREM DEN

### Tsüngrem teka nung

*Po ateper teka nung lishi ama, nenok Kü teka nung lir, o Israel kin. - Yerima 18: 6.*

Yirusalem nung ajaki anguba mapa kaji ibai liasü. Yerima noklang aiben ibai ngur alitsü. Po ateperi lishi koda anepalua amshia taginüba po adokdaksür. Saka iba anogo nung Tsüngremi Yerima nem lesson tajung ka agütsü, aser par nüburi lishi ama liasü. "O Israel kin, poteperi ama Ni nenok dang meinyaktetsü asü?"

Tsüngremi anepaluba aser aremzükbata tishitsü iba dangi tuluba Laishiba nung mangur. Kodang poteperi pai yangluba po nung tarak angu pai aji odang ajungdok.

Pai aji bener ao aser yanglushi. Kodang asenoki Tsüngrem sentong nung tamakok ngudir, kodang asenoki Pa ozüing anema temenen menadir, kodang asenoki asenji tama sūdaksüdir, idangjia Pai asenok mesendoker. Tsüngrem tekai maneni temenen pur dak mapa inyakba aseni metetter. Pai maneni Pa taochi aser temeim agi asenok ajar. Asenok Tsüngrem teka nung lir. Tsüngrem teti taremzükbata aser temeim mapa agi koda sayur - Yisu Khrista nung asenok tekümtet asoshi mapa inyaker. Yisu tenüing nung Pai asenok temenen aidoktsü. Tanela Temeshi o nung osang tajung ajanga aser Temeshi ozüing ajanga taküm tasen agütsür.

## Kidang tekülem agitsü atema temelaba meshitsü menüingdak: High Court

**April 01, 2026:** Chhattisgarh liasü.

High Court-i, kidang adenshia sarasadem sentong agitsü atema ketdangser dang nungi jelia temelaba meshitsü menüingdak, ta metetdaksü.

Police-i Janjgir-Champa district nung Khristan ana nem notice asem agüja liasü, ajisüaka High Court-i notice asemprong agientsüba den külemi ketdangsertem dang yimsü dak sendakba inyaksangshi nung mejangjongtsüla, ta metetdaksü.

Janjgir-Champa district kübok Godhna yindak Khristan ana- Badri Prasad Sahu aser Rajkumar Sahu nati temepishiba ken o ka agütsüba sülen March 24 nü Justice Naresh Kumar Chandravanshi-i iba obendang agüja liasü.

2016 küm nungi Prasad Sahu aser Rajkumar Sahu nati parnok meyong kidang mezüingbuba 'floor' nung hall ya yanglua yangji sarasadem sentong agia arur.

Ajisüaka police-i Bharatiya Nagarik Suraksha Sanhita, 2023 kübok Arrla 94 nung ajemdaker tekülem sentong agiba nokdangtsü atema inyak. Police-i yaküm October 18 anogo nung, November 22 aser taküm February 1 anogotem nung notice agüja liasü.

Khristan ana atema ken o jembitsür advocate Preetam Singh-i court dang, sarasadem sentong nungji ozüing alema kecha meinyaker aser tesünep meraksatsür, ta metetdaksa

Paisa, tamalen Gram Panchayat of Godhna-i 'No Objection Certificate' agüja liasü, ajisüaka taangri rongshiba ajanga iba certificate ji meyipa agi, ta metetdaksü.

Iba sülen Khristan ana jagi India temzüing kübok Arrla 226 nung ajemdaker High Court dang police-i agütsüba notice ji agienjang, ta shia temepishiba ken o agüja liasü.

Court nung ken o jembiba mapang Deputy Government Advocate Shobhit Mishra-i, Khristan anaji anema ozüing alema inyakba ken o benokogo aser tamalen-a tena jail nung puoka liasü, ta metetdaksü.

Mishra-isa, sarasadem sentong agitsü atema Khristan ana jagi ketdangsertem dang nungi jelia temelaba memeshi, ibayongji police notices agütsü, ta metetdaksü.

Tesüsa court-i, "Pei kidang sarasadem agiba nokdangtsüsa ozüing kecha mali," ta metetdaksü.

Court-isa, "Sarasadem sentong agiba ajanga ola tulu adoka timtem agütsüra, mesüra tensa raksatsüra tim ketdangsertemi ozüing kübok inyaksü akok, ajisüaka sarasadem sentong agiba kija ashishibajibo tim masü," ta metetdaksü.

Court-isa ketdangsertem aser police dang bushisüingdangba tenüing amer Khristan anaji amokmeren masütsüla, ta metetdaksü.

## Palm Sunday nü Plateau state nung Khristan 27 tepset



**April 01, 2026:** Palm Sunday anogomong nung Nigeria kübok Plateau State nung Khristantem amakdang nisung 27 süogo.

Aonung 8:00 ako meta Jos yimti kübok Angwan Rukuba nung mejangjaba nisungtemi lokti dak injang khaloktsü; iba tesem nungjisa nisung 14 asü aser yirurtem 13 bo hospital nung asü. Iba tatalokba sülen ghonda 48 curfew ozüing benok. Governor Caleb Manasseh

Muftwang-i, "Tai maket sensotem amakba tatalokba ya state sorkari sashia aitsür. Aibelenertem aputsü aser ochi obendangdaki anir arutsü atema inyakdar," ta metetdaksü.

Tang Plateau state nung tensa mejungi aliba mapang nung Khristanten dang Easter atema sarasademtsü ayongzükogo. Tang tashi nungbo shirnoki amakar mejangja.

Iba tatalokba ajanga University of Jos (UNIJOS) nung March 30-31 anogotem nung tatidang agitsü aliba atsülangogo.

Palm Sunday nü Khristantem amakba tatalokba dak sendakba nung America nung missionary, Alex Barbiri Nigeria Tir dang, "Nigeria nungertem aser Khristantemi ayimdenba ola ya nai kodang angashitsü," ta metetdaksü.

AO OSHI ANGAZÜKDAK:

TANÜ ANGAZÜKTSÜBA OJANG



Waoktsü

(v) nok mesüra süngrangtsü agi rangoka aiba ( cut deeply by saw or dao)

\* Ki asürtemi süng tulu asüba agi aiben waoktsü.

Wapet

(v)aibelenang arang, aibelenang aitem (incorrectly sawn or wrongly played)

\*Süngrangtsü amshi mashiba agi süng tajung ka wapet aser tatem junga mashiba agi kongkia wapet.

OLONG PAITEP # 7462

16x16 crossword grid with numbers 1-16 indicating starting positions.

TIPLÉN

- 2. Auonung chiyongtsü asenba
5. Mangyimba mapang
7. O tamendakdak
8. Peidak malangba
10. Juli
12. Sen ayudak
14. Tenük agi ajitet
15. Tamajung aküm
16. Apuso

LANGTSÜNGLEN

- 1. Lenmang
2. Aor kidong ka tenüng
3. Tenarong maten
4. A \_ \_ \_ g
6. Mopung apodoka
9. Tongtipang tagitsü
10. Menungra bilem
11. Aiür
13. S \_ \_ \_ k
14. T \_ \_ \_ r

OLONG PAITEP # 7461 TELANGZÜBA

TIPLÉN :

- 1. Yiar, 3. Tesola, 7. Yimra,
8. Tangar, 9. Peria, 10. Tanur,
11. Tasen, 13. Lemjem, 15. Tambu,
16. Khuret, 17. Sang.

LANGTSÜNGLEN :

- 1. Yimti, 2. Amen, 4. Shiner,
5. Alaka, 6. Satan, 9. Putet,
10. Tembar, 11. Tatok, 12. Amang,
14. Jala.

NAI-A YA METETTER



Manhattan nung Upper West Side nung auction ka asüdang 1945 Domaine de la Romanée-Conti pongdang ka \$812,500 (Rs. 7.63 crore) agi yokdokoko.

Acker-i kümshia ayongzükba La Paulée auction nung iba yi pongdang ya otsüsütsü keta ayok.

1945 Domaine de la Romanée-Conti bottle ayokba ajanga taoba nung 'most expensive bottle' alima otsü yanglua aliba 50% jungnüa agi ajatetogo ta Forbes report ajanga ashir.

2018 La Paulée auction nung iba kasa 1945 vintage beverage indang pongdang ka \$558,000 agi yokdoka alima otsü tasen yangluteta liasü saka ibaji taküm ajatetogo.

Arunachal nung Dalai Lama indang Freedom Trail jajar



Itanagar, April 1, 2026

(Agencies): Tibetan tamangba yimsü lennir Tenzin Gyatso-i 1959 küm India-i aruba lenmang dang Freedom Trail ta tenüng jalokja lir aser March 31, 2026 nü Arunachal Pradesh kübok Tawang district nung Freedom Trail second edition tenzükogo.

Kenzamani nungi tenzükur Pungteng Tse tashi anogo troknü tetsüng agi jajaba ajanga Dalai Lama mezüng India-i aruba bilemteter. Iba sentong ajanga

yimjung, akanga noktakba aser sobaliba senmang ajungketer.

Dalai Lama-i Kenzamani ajanga India-i aruba sülen Pungteng Tse nung amung. Chinese yimsüsüba anema noktakba sülen pai Tibet toktür India nung arua jenoka liasü.

Mongulbarnü Zemithang nung iba sentong tenzükudang Lungla MLA Tsering Lhamu, Tawang Zila Parishad chairperson Leki Gombu, Tawang Monastery Abbot, Lungla ADC Tashi Dhondup,

asere Indian Army ketdangsurtem aden.

Lhamu-i Freedom Trail nung shilem agirtem dang "küm roker tejakdang kodamasüba tensa ajurua jajaba lenmang kasa nung nenok jajar" ta ashi.

Iba jajaba ajanga telongjem, bilemtetba aser sobaliba konang sayur aser shilem agir ajak pelashishia agizükur ta lai ashi.

Iba sentong nung adenertemi Dalai Lama asoshi arishi aser anema aliba taküm meshia sarasadem.

ST certificate kijai dangbo lisopur temeten kümzuka meyetet

Guwahati, April 1, 2026

(Agencies): Garo Hills Autonomous District Council (GHADC) elections nung tokteper candidate temi Scheduled Tribe (ST) certificate agütsüsüla ta Meghalaya sorkari tawa inyakyim latetba ajanga lisopur Garo nung kümzuka meyetettsü Congress lennir aser taoba South Tura MLA John

Leslee K. Sangma-i ashi.

Iba sangdong ya Meghalaya Governor-ia agizükogo aser National People's Party (NPP)-i inyaktetba mapa ka ta züngshir.

Ajisüaka, John Sangma-ibo iba inyakyim nung ashishiteper aser meinyaktettsü keta lir ta ashir.

ST certificate ka nungdakba ajanga dangbo tang lateta aliba

inyakyim nung ashishitepba magiener. Sorkari "tribal" ta asüba nung tribes 11 aser sub-tribes 37 dena lir aser iba ajanga elections nung Garo Hills nung malirtema shilem agitettsü ta John-i ashi.

"Asenoki takok mangu. Asenoki kishi shibang saka kichibabo lapoka yutsü" ta paisa shisem.

Assam election nung forest staff amshiba ashishiteper

Guwahati, April 1, 2026

(Agencies): Assam sorkari election duty nung forest personnel amshitsü tetuyuba meyipa agiang ta taoba bureaucrats aser conservationists-i ashiba sülen ano retired civil servants 40-i kasa temepishiba agütsüogo.

Assam environment department-i March 19 nü April 9 nü assembly elections nung Assam Forest Protection Force

(AFPF) personnel dang police den yariteptsü tetuyuba agütsü.

Election Commission of India ajanga territorial forest forces aser tang teinyakdak Indian Forest Service officers dena forest ketdangsurtem election dak sendakba maparen nung mamshitsü shia lir ta retired civil servants-i shidi ka nung ashi.

Supreme Court of India-i 2024 nung forest work balaka asüba agizük aser parnok

election dak sendakba maparen nung mamshitsü oshidang agüja lir ta parnokisa ashi.

Item tetuyubatem alema inyakbaji judicial orders alema asütsü aser state sorkar anema ken o benoktsü akok ta retired civil servants-isa metetdaksüogo.

AFPF personnel mapa belenba ajanga Assam nung wildlife protection maparen tashimait akümtsü akok ta parnokisa ashi.



Meghalaya Chief Minister Conrad K Sangma-i March 31 nü 'Mission 1000 Days' tenzüksüdang agiba noksa ka angur. Iba mission-mode programme ya tanur ka taküm nung mezüng anogo 1,000 dak rangloker inyaker. Iba sentong ajanga nutrition, essential services, aser enhanced community participation ajanga tanur tetsü aser tanur tajungba kümdaktsütsü nükjidong lir. Mission 1000 Days atema state sorkari Rs 127 crore lezmükja lir aser iba ajanga additional nutritional support, awareness initiatives, training, aser mother-and-baby kits agütsüsü.

# Crimea nung Russia mitkar indang tayimtsü ka tsükok, nisung 29 asü



**Moscow, Rongchii/April 01 (Agencies):** Russia mitkar indang tayimtsü ka pari Ukraine ket nungi rakzüka aliba Crimea tzümeketli nung tsükoka yangji mena aliba nisung 29 asü, ta Russian defence ministry ajanga ashi.

An-26 aircraft ya "routine flight" mapang ketdangsürtem den osangtsüsang agitepba samaba sülen Mongulbarnü ajasar aliba ngutet, ta ministry ajanga ashir.

Technical timtem liasü aser tayimtsü tema nung teraksaba kecha meliasü, anungji missiles, drones mesüra ozü agi iba lendong ajuruba masü ta angateter.

Tayimtsü ketdangsür tenet aser passengers 23 mener iba tayimtsü ya Ukraine indang Crimean peninsula alema oa liasü, koba Russia-i tashiyim amshia 2014 küm rakzüka.

Russia indang Investigative Committee-ia iba tayimtsü tsükokba metetdaksü aser flight safety nung aibelenba indang bushisüngdang ka tenzüko.

News agency Tass ajanga ashiba agi, iba tayimtsü den osangtsüsang agitepba ya Mongulbar nikongdang 6:00 ako (par mapang) sama aser iba sülen bushiba mapang teraksa ya ngutet.

Ukraine-i iba lendong atema osang kecha sangdonga mali.

An-26 ya Soviet mapang yangluba tayimtsü ka lir, koba mitkar temi osettsüset tulu aser

passenger ishishi bener meta tatsütsü senzüba nung amshir. Iba tayimtsü ya Ukrainian aerospace company Antonov ajanga yanglu.

Item tayimtsü ya 1960s tatemlen nungi amshia arur aser aiben lendong tesashi ajurua lir.

2020 küm Ukrainian An-26 ka Kharkiv nung tsükokba mapanga cadets timba sür nisung 26 asü. Iba sülen 2021 küm Russian Far East nung iba tayimtsü ka tsükokba nung nisung 28 asü aser 2022 küm Ukraine indang Zaporizhzhia region nunga ka tsükoka nisung ka asü.

Küm pezü tejakdang

Moscow-i tashi ajak amshia amak tenzüka sülen Ukraine aser Russian sepaitem tsüngta raraba manener.

Ukraine-i peninsula nung Russian military bases tem timba amaker, koba Ukraine south tsütsü Russia-i amokbanga aliba Kherson region den arütsüa lir.

Ukraine Tir Volodymyr Zelenskyy-i Russia dang ceasefire nung shilem ka ama Crimea nungi ainshitsü akhanger. November ita US-i yaria yimjung sentong ka yangluba nung Kyiv-i Crimea nung yimsü asüba yutsütsü shia liasü.

# Donald Trump-i Iran rara tembangtsü mulunga lir

**Washington, Rongchii/April 01 (Agencies):** Strait of Hormuz shibanga liaka Iran anema raraba tatem kati arutsü US Tir Donald Trump-i mulunga lir, ta The Wall Street Journal ajanga ashi.

Trump aser pa den yariteper temi tongtipang tzü lenmang tanaben lapoktsü atema kanga tepenja operation nungya pai hopta pezü nungi trok tashi agitsü mulunga aliba alema aotsü südi ta asadangteta lir ta osang ajanga ashi.

Iba melen administration-i par telungtiba mitkar nükjidong takok angutsü asoshi rangloknor, koba Iran indang navy tashi mait kumtsütsü, par missile bendena aliba ajemtsütsü aser par defence industry aser nuclear tashi ajemtsüba sülen

tsükchitep anentsü aser diplomacy nun gang tali metaloktsü bilemer, ta ketdangsür temi ashi.

Trump-i yimjak nung iba strait indang osang balala agütsür, khen-khen iba tesem melapokra Iranian energy infrastructure nung bomb pokloktsütsü ta amokmeren aser ano mapang ka-ka pai iba tzü lenmang nung senzüttsü ya United States dang nungi danga linüktem asoshi tongtipangtiba lir ta ashi.

Secretary of State Marco Rubio-ia tang military objectives ya hopta ishika tsüngta tembangtsü aser iba sülen strait tanaben lapoktsü Iran-i telemtetba agitsü mesüra tzüyim nung senzütsü temeden amshitsü asoshi coalition

# MULUNGNEN O



Asür YIMSANGPANGLA  
20.08.1938 - 27.03.2026

Temeim agi sünga alila ojala Asür Yimsangpangla (Molungkimong) shiranga aliba mapang aser akumli wadang tembangba mapang yimtsür-yimer, kiyong-kidanger, tembartem aser temeimer temi sarasadem, temeim aser yimya balala agi yaritepba atema kinunger temi nenok dang kangasa pelaba lemsateper. Nenoki semdangba, ajungmesoba aser yimya balala nung temeim sayuba ajanga onok tesama tia nung alidang tashi agütsüogo aser anisüngzük nguogo. Onoki nenok nem meyipa agütsütsü kecha mali, saka Tajungsang Tsüngremi nenok kija shia mulamushia moajang ta sarasademtsür.

Temeim nung,

Jala-jabaso, semchir aser kinungertem.

## OFFICE OF THE KHAR VILLAGE COUNCIL

P.O. - Mangkolemba, District - Mokokchung

### SANGDONGER

Khar lushi nung aliba ayong tulu-tila ajak nung miim-mozü aser battery mamshitsü iba adok anogo nungi tenzüka, meshi meshia nokdang. Aibelener senchi Rs.1,00,000/- (Rupees One Lakh only). Iba ozüng mita reprangtsü Indo mapang nem nungloksür.

Sd/-  
(LIMATOSHI), Chairman

Sd/-  
(TAREPTSÜNGBA), Secretary



Bucharest, Romania nung awareness sentong ka aliba mapang domestic violence agi kongshir alirtem den dena lir ta temaitsü tsüngsem sentsü temerem yuja aliba anasa tetsür ka nokdaka aliba noksa nung angur. Romania nung domestic violence mechi hopta shia tetsür ka asür ta ashir.

linüktem mapa asütsü ta ashi.

Tang rara nung Strait of Hormuz ya tongtipang tesem ka lir, koba ajanga alima nung totzü shilem 20 shi abener, anungji ano mapang tali shibanga ayuba ajanga alima nung tebilemstü tulu ajurutsü.

Iba strait ajanga taoba mapang timtem kecha makai totzü abenba rong tem senzüa liasü, saka Iran-i iba tesem shibangba ajanga linük aika timtem nung lir.

Fertilizer aser semiconductor oset nung amshiba helium amala energy dak sendakba osettsüset nung metaloka aliba yangluba nung totzü agi anüngapongba tali jangja meteter.

Iba tesem ajanga totzü abenba nung maneni tenokdangba agütsüba ajanga alima nung rongsenketzung timtem tuluba akumtsü, kechiaser tang totzü barrel nung sen \$100 dang timba agi alir.

White House-i raraba mapang ajemtsü tejangraba aliba ama sayuaka, region leni US mitkar yokba manener.

White House press secretary Karoline Leavitt-ibo Strait nung normal operations atema administration-i inyaktar ta ashi saka tanaben lapoktsüba ya mitkar indang nükjidong rongnung ka amabo mashi.

Treasury Secretary Scott Bessent-i nüngdakra United States mesüra linük balala coalition-i iba strait ajanga tankers tem min nung ajungtsü

ta ashir.

Region nung maritime security atema inyakba nung United Kingdom, France aser Canada densema linük 40 jungnüai yariteptsü mulunga lir ta sangdongogo.

Hormuz den külemi ano Iran indang Kharg Island nunga rangloker, koba totzü belenshiba tesem tongtipang ka lir.

Iran indang crude oil bendang lima nung bener oa ayokba shilem 90 jungnüa Kharg Island yagi ketdang asür, koba Tehran indang rongsenketzung asoshi tongtipang akumer.

Strait tanaben lapoktsü atema yimden yimsüsür temi jembishinüba nung tamakok ajurura iba asetkong nung tenük yoktsü mesüra rakzüksü ta Trump-i shia lir.

US sepaitemi iba asetkong nung air defence systems, radar infrastructure aser hovercraft base densema tesem karbo makogo.

Ajisüaka American sepaitem iba tesemi yokra Iranian mainland nungi amaktsü akok ta asadangteta lir.

Aikati Iran nunger totzü abenba rong tem nung tenük yoker tenokdangba agütsüba ajanga rongsenketzung alentsü atema ground operation menüngdaker ta ashir.

US ketdangsür temi Iran indang mitkar tashi ajemtsüra strait azüokba tashi ajema akumtsü südi ta amanger, saka akhi ama rong tem jajatsü asoshi mapang meshiteter.

## Süngkomen Ward Mokokchung Inter-Ward Football Tournament final nung asayatsü



Mokokchung Inter-Ward Football Tournament-2026, mezüngbuba Semi Finals Süngkomen Ward aser Artang Ward tsüngda asayaba mapang tangokba noksa.

**Mokokchung, Rongchii/ April 01 (TYO) :** Imkongmeren Sports Complex Mokokchung nung tanü 7 Buba Mokokchung Inter-Ward Football Tournament-2026, mezüngbuba Semi Finals Süngkomen Ward aser Artang Ward tsüngda nikongdang 1:30 Ako nungi tenzüka asayaogo aser iba asaya nung Süngkomen Ward-i goal 3-1 agi Artang Ward kokteta Final asayatsü jenjang ajangzüketogoto.

Asaya tenzüker kelen

minute 10 buba nung Süngkomen Ward nungi j.no 7 Tarepnungasang goal-1 yok aser kelen asaya-a or anisüngzükba mapang agi.

Anisüngzüker kelen tanaben ground-i aita asayaba mapang minute 52 buba nung Artang Ward nungi j.no-11 Chubalemba-i goal-1 yokteta telok ana kasasa aküm.

Telok ana kasasa kümer kelen takok angutsü meranga nungtepa asayaba mapang tia maka Tongdentsüyong Ward nung j.no-19 Aotoshi-i minute

47 buba nung Yellow Card achi. Tongdentsüyong Ward pur j.no-17 Lipoksüngba-i minute 61 buba nung goal-1 aser j.no-11 Lipoksünep-i minute 68 buba nung goal-1 ta yoktet nung Süngkomen Ward-i Artang Ward goal-3-1 agi kokteta Süngkomen Ward pur Final asayatsü jenjang ajangzüketet.

Tanabuba Semi Finals asaya April 02 nü nikongdang 1:30 ako nungi tenzüka Tongdentsüyong Ward aser Mongsenbai Ward asayatsü lir.

## Contract tembangba sülen Bernardo Silva-i Manchester City toktsütsü



**Rongchii/April 01 (Agencies):** Portugal nunger nüngtugu asayar Bernardo Silva-i contract tembangba sülen Manchester City toktsütsü. Pa ya club balalai alizüktsü jangraba lemastepogo, saka pa Barcelona-i aotsüba dak dang rangloker lir.

A Bola sangdong ka ajanga ashiba agi, Silva shiba 2017 küm City nung aden, pai pa Camp Nou nung asayatsü asoshi nükjidong lir ta jangja jangja metetdaksüogo. Iba tejangraba ya pai pa indang agent Jorge Mendes den lemsatopogo, shiba Barcelona tir Joan Laporta aser sporting director Deco na den kanga junga sendaktepa lir.

Mendes-i achaayanga Lamine Yamal, Alejandro Balde, Marc Casadó aser João Cancelo nunger ajak club nung denogo. Osang ajanga ashiba agi, Silva La Liga nung oa Barcelona nungi asayatsü tejangraba lir.

Ajisüaka Barcelona atema Silva alizüktsü ya kanga tongtibangbo masü. Mapang ka nungbo parnoki pa alitsü merangogo, saka sporting director atema pa ya kangabo tongtibang masü kümogo, kechiyong club nung midfield nung asayar aika lir.

Ajisüaka Silva-i position aika nung asayateter asününg pa right winger ama-ia

asayadaksütettsü.

A Bola-i ashiba agi, tanga club nung adentsü atema masadang tsüngda Silva Barcelona nungi maongka agütsütsü imla atadar. Pa ya Europe nung Juventus amala tongtibang club temia aginer aser iba den MLS aser Saudi Arabia nung club temia pa alizüktsü tejangraba aliba lemsatopogo.

Kasa mapang nung taküm lemluwa Silva alitsü jangrartem aika adoktsü imlar. Juventus pur pa den küm asem atema tenangzüktepba yanglutsü renema lir aser tenangzüktepba kübok pa küm nung euro million 7-8 aazüktsü, ta osang ajanga metetdaksü.

Maneni Silva Saudi Arabia aser Major League Soccer nunga oa asayatsü maongka lir. Inter Miami puri pa alitsü tejangraba aliba sayuogo. Spain nung Atletico Madrid puria pa den tongtepratepa arudar aser pa Galatasaray-ia aotsü akok.

Pep Guardiola lenisüba nung Manchester City puri takok tajung ngua arudar aser iba team nung Silva ya kanga dang tongtibang asayar ka lir.

## Küm 40 sülen 2026 FIFA World Cup atema Iraq qualify süogo

**Baghdad, Rongchii/April 01 (Agencies):** Italy asemben tashi FIFA World Cup nung masayatetsüba indang nisung aikati magizükteki süngmangba mapang Monterrey nung ano otsü tasen ya ola madoki yangluogo.

"Lions of Mesopotamia" ta ajaba Iraq linük ya 1986 sülen tang mezüngbuba World Cup nung shilem agitsü jenjang alangzüktepa playoff decider nung Bolivia madak 2-1 agi takok angu aser football indang sapang tulutiba nung küm 40 shilem magi aruba tembanger.

US aser Israel nati Iran amakba sülen iba rara nung Iraq atsioka Middle East nung tensa mejungi teblemtsü agi sünger lia iba asaya ya liasü.

Iba azüdokshi tenzüker Iraq nung nisung 100 dak tema tepsetogo ta ashir. Ajisür teimla maka liaka football ajanga telungjem mapang tajung ka

sayu. Prime Minister Mohammed Shia al-Sudani-i iba takok ya otsüsütsü mapang ka lir ta tushia liasü.

"World Cup asoshi asen national team qualify asüba ya Iraqi sports puti totsü nung tongtipang mapang ka lir aser alima sapang nung asen linük nokdakba ulushir," ta pai ashi.

Head coach Graham Arnold-ia, "Asenoki nisung million 46 peladaksüba, talisa tang Middle East nung iba tensa lia asenoki ya ajangzüktepa asoshi ni kanga pelar," ta ashi, shibai taoba mapang Australia anir Round of 16 tashi asayateta liasü.

Iraq ya Group I nung France, Senegal aser Norway den külemi ataar.

Iba asayamung ya United States, Mexico aser Canada nung June 11 nungi July 19 tashi asayatsü lir.

## FIFA World Cup 2026 nung asayatsü team ajunga jangjaogo

**Rongchii/April 01 (Agencies):** FIFA World Cup 2026 nung asayatsü team ajunga jangjaogo aser continents ajunga nung qualigiers aser playoffs final round asayaba sülen team 48 prongla jangjaogo.

Last six spots ya March ita shibanga UEFA playoffs ajanga Sweden, Turkey, Bosnia and Herzegovina aser Czech Republic atu. Intercontinental playoffs ajanga Iraq aser DR Congo ait.

United States, Mexico aser Canada nung iba asayamung tuluba kumer June 11 nungi July 19 tashi asayatsü, kong teams 48 aser groups 12 asaya mezüngbuba alitsü.

**FIFA World Cup 2026 nung asayatsü team tem yamai alitsü:**

**Co-hosts:** Canada, Mexico, USA

**AFC:** Australia, IR Iran, Japan, Jordan, Korea Republic, Qatar, Saudi Arabia, Uzbekistan, Iraq  
**CAF:** Algeria, Cabo Verde, Congo DR, Côte d'Ivoire, Egypt, Ghana, Morocco, Senegal, South Africa, Tunisia  
**Concacaf:** Curaçao, Haiti, Panama

**CONMEBOL:** Argentina, Brazil, Colombia, Ecuador, Paraguay, Uruguay

**OFC:** New Zealand  
**UEFA:** Austria, Belgium, Bosnia and Herzegovina, Croatia, Czechia, England, France, Germany, Netherlands, Norway, Portugal, Scotland, Spain, Sweden, Switzerland, Türkiye

**FIFA World Cup 2026 group telemsa yamai alitsü:**

Iba asayamung nung groups 12 aser yangji team pezü-zü alitsü:  
**Group A** Mexico, Czech Republic, South Africa, South Korea

**Group B** Canada, Bosnia and Herzegovina, Qatar, Switzerland

**Group C** Brazil, Haiti, Morocco, Scotland

**Group D** United States, Australia, Paraguay, Turke

**Group E** Curaçao, Ecuador, Germany, Ivory Coas

**Group F** Netherlands, Japan, Sweden, Tunisia

**Group G** Belgium, Egypt, Iran, New Zealand

**Group H** Cape Verde, Saudi Arabia, Spain, Uruguay

**Group I** France, Norway, Senegal, Iraq

**Group J** Algeria, Argentina, Austria, Jordan

**Group K** Colombia, Jamaica, Portugal, Uzbekistan

**Group L** Croatia, England, Ghana, Panama.

## BILEMDANGANG

"Aseni nüngdakba tesangwa ajak asen dak lir, asenoki aji amshitsü nüngdaker."